

Kribõnid 2007 - 2009

kõnde müüdü uulitsat
hääd kätt oll' pöetü moro.
hain oll' kuionu ni krõbõ,
hõngas nigu kunagi
mitmid suvõsid tagasi
jaloti tassa kodo poolõ
nõna hainahõngu täüs
näide aokibenidõ peräst
tasos ollaq ni elläq!

*

naanõ om ilmasammas
timäldä ei olõs midägi
ei inemiisi
lämmit kodo.
nii tii maq täämbä:
juu verevät mahla
lüü hiussõ sälä pääl lakja
olõ uhkõ
esihindä ja kõigi sõsaridõ üle,
kiä latsi kasvatasõq
uma tüüd tegeväq
laulvaq
ommaq naasõq.

*

unõh Saq mudsohtat
muq sälgä
naarahta hellält
sedä olõ maq uutnu
kõik neoq ütsindä oltuq aastaq
sedä ütte ni ainumast armast
kiä om must tennü
kullatsidõ sainuga kambre
kuningannas

*

kibehüs muq mõttih
nigu kihvt
midä egä päiv
hindä seeh kannä
vällä ihost
vällä hengest tedä ei saa
taivaesä,
anna meile andis
mi hõelus ja viha

anna andis
näile, kiä meid kihvitäseq
näq ommaq onnõduq.

*

kuis maq tunnõ äräq kodo
üles lövvä uma ussõ?
maja maja peräh
uulits uulidsaga üttemuudu
pihlõpuu tervütäs
kodo lähküh aianukah
viis ruusi verevät
lõhnalist lillikõist
aia veereh
sininõ uss
nummõr ütstõist

*

külh näq küsüväq
kost maq tulõ
lasõ neil arvada
seod ja tuud
Poolat ja Prantsust
Vinnemaad ja Valgõvinnet
Soomõt ja Skandinaaviat
ja sis maq ütle, et ei
olõ peri väikust Eestist
Võromaalt.

*

muq kässi pääl
om tsesnoki ja loomaliha hõng
nii uma ja hää
nii kodonõ
bussih, miä haisas
saja lõhnavi, alkoholi, aolehti
huulmada olõmise ja ulluse perrä.

*

Päiv lämmistas
Väikut lumpi uulitsal
Tuhandit kullaterri võinu kor'ada
Ku õnnõ tahtnu.

*

hummok.
ei olõki nii külm ku arvassi
pilvõq hoitvaq lämmit
ja tuult ei olõ.
Hoimatsõq
unitsõ inemiseloomaq

uutvaq bussipiätüseh
saisva allmaaraudtiijaamah
uutvaq tüülejäudmist
et edimädse kangõ kohvi pääle
kunturiello herädä.

*

sai sõna.
sai maailm.
maa-ilm.
sõna seeh om maailm
sääne nigu sõna esiq
maa-ilm.

*

barbarissi kompvek
tuu miilde lämmä suvõ
vihmalikõ hummogu
hainategemisõ
latsõnaaru
ikmisõgi
latsõpõlv üteh karamellih.

*

unõnäoq
ommaq ummamuudu ilm
olnuq ja ollõv
lännü ja tulõv
saavaq kokko egä üü
erineväq kotussõq
Põlva ja Vahtsõliin
kats eri kotust üteh
katõlt eri maalt.

*

näi üüse unõh
et saisõ ubinapuu all
ossaq käveväq maani
ja rohilidsõq ubinaq
hõngassivaq
seo oll' Tartoh
üte uulitsa nuka pääl
nimme ei tiia
a kotus oll' tutva.
ja tull' üts miis ni laulsõ
vanna vanna laulu
midä iks hengesopih kanna
maq saisõ puu varoh

ni leeloti perrä
sis löüd tä muq üles
vött üskä
ja hoitsõ hindä man.
illos oll'.
kõnõli tallõ vanaimä koolmisõst
kallisti
mudsohti
...ja sis heräsi üles.

*

Kogo ilma hummoguq
Tahassi andaq Sullõ,
Muq süäme armsamb.

Kogo ilma pääväq
Tii pühäs Suq avvus,
Muq süäme armsamb.

Kogo ilma õdaguq
Ommaq õnnistedüq Suq peräst
Muq süäme armsamb.

Kogo ilma üüq
Kingi maq Sullõ, ja hindä
Muq süäme armsamb.

*

mõnikõrd om luulõtus
om nigu langakerä -
tä viirdüs suq pääh valla
õnnõ jupp jupi perrä,
kuni peris valmis saa.

mõnikõrd om luulõtus nigu välk -
sis tä tulõ üte suurõ pauguga
om tävveste valmis
esihindä jumaliguh iloh
ja midägi muuta olõ-iq vaja.

*

maq tei maja mäe pääle
kodokese kundi pääle
tarõkõsõ oro taadõ.
alussõs sai armastus
sainaq tukõst tammõpuust,
katus pääle kallist kangast
ussõq-aknaq urbõpuust
põrmanduq sai pardimunnõst

*

Maaimä,
kunas saa täüs suq hing
näide inimmutikidõ pääle
kiä Suq iho pääl
rüvetüst teeväq?
kunas nösöt
ni näütät uma näko
lasöt liinol häödä
tuut tuult ni tormi,
ni mõtsol, põldöl ja võsal,
eläjil ni tsirköl
uma kodo tagasi saiaq?
oh Maaimä,
lõpmalda om Suq kannatus
harva nättü nägelikküs -
noq kas olõt latsilõ
liiga pallo võimu kätte andnu?
inemine ots
kimmäst kotust
kost kinni hoita
mille pääle hinnäst tugõda
rassõl aol.
kae sälä taadõ,
armas inemine.
otsi esivanõmbide tarkust,
otsi laulõst ja lugudõst,
otsi keelest.
kae ettepoolõ
noq hoiäq jalaq maah.
nii saa minnäq edesi!

*

Kuulsusõjanotsilõ

röögi ropult
kiso hinnäst paljas
kuuluta hinnäst homos
mineq riääliti televisiooni
supõrstaaris
vaihõtusnaasõs
kaaslasõotsjas
sõiduta politseid kapoti pääl
kommõnteeri Delfih
laamõnda poodi man
ku viina ei anta

vinguq kõikaig kõgõ üle
vai sopalehen.
lõpmalda võimalusõq ommaq
mi aigu
kuulsas saiaq
ja kuulsas jäiaq
mi kõllanõ meedia juusk
suq mano nigu raisakotkas
raipõ mano.

*

kullõ Lindpriide plaati
Kalda Indrek laul
luku kavvõst kodomaast
ni soldanist, kiä kord jõudaq taht.
silmävesi
nigu perli põski pääl
ku mõtlõ, et esä kullõs samma laulu
just parhilla
tõsõh ilma otsah.

*

eelätseh
tai chi tunnih
tull' jälleki miildõ
esiimmi tiidminõ:
ull ja kõva lätt kimmäle purus,
tark lask minnäq ni jääs elämä.

*

noorõkuu helle tsirp taivah
ni värskilt niidetü haina hõng
ütsik tsirk laul
õdagu kell kümme
hää om nii kodo kõndi
metroojaamast.

*

miq ao inemiisil
om uma jummal
kinkä kõrval ommaq jõvvulda
kristus ni Allah
vast Taaragi.

seo om ilosidõ rõivastõ
läükehtidõ
magusa mukmisõ

mõttõlda ilosidõ asjakõistõ...

puutõ jummal.

timä templiq ommaq markõtiq
supõr-, hüpõr- ja ipõrmarkõtiq
kalliq putiigiq
vähemkalli kaltsupoodiq
kaubanduskesküseq
kodomaaal
vällämaaal
kunagi vast taivaruumih kah.

poodijumala altari pääle
- kassadõ -
viivaq ostjaq-tarvitajaq
uma anniq
umast taskust
naasõ vai mehe palga
esi lainus võetu – ku uma inämb ei olõ.

ostmisõ ja puutõ jummal om kõgõ üle.
timä and hüvä tundõ ja hengerahu
vahtsõ rõivatükü/asja kapih ja süämeh.
tä täüt kõik sooviq ja tahtmisõq
parhilla ja igävest

aamõn.

*

hummogunõ uakohvi hõng
tunnõ inne heränemist
tä pehmüst
nõnah
ei nõsõ viil
kõva asõma päält
jää uutma
esä hellü
miä minno üles kuts
ei kuulõ maq
hummogu esä hello
ei imä kutsmist kah
taskutelehvon
lõugas umaette
kohvikann vilistäs
köögih.
ehh.
iisbä hummok.

*

miq ao märk –
pallo värviliisi raamatit
naastõ ikuraamadit
tapulugusid,
söögiraamadit
elo- ja olõmisõ kirändüst
hindäavitamisõ oppusi
ilosidõ suuri piltega
tsillokõsõ jutuga
sest inemisel ei olõ aigu
istu ni raamadu sisse minnäq.
kiirsüük ni kipõ lugõminõ
hummogunõ aoleht
olku iks olõmah
egä päiv
*

pihlõpuu
hõngas varahummogu
päälevihmatsõh luhvtih
ni makus
praaditu saia lõhn
segünes
keväjätundõ
ja riidirõõmuga
*

mõnikõrd unõtami
seoh ilmamurõh ja hindä hädäh
et võiolla ei olõki kõik nii kehväste
ku edimädsel kaemisel tundus.
astu sammukõnõ tagasi
ja kae, kos saq saisat.
sis mine edesi
külh lätt jälki parõmbas
*

luulõ
om ütiskunna peegli,
vajalik var'okaetus -
ütskõik, kas illos ja puhas
vai väänät ni moonutõt.
om olnuq
ni om ka tulõviguh.
neoq,
kes esi moonutõt,
näeväq peeglih kah kurja
vai hirmsat inemist.
ja oi, sis om vallas!
*

hämmärhall hummok
väläh satas vihma
taivas ikk ilma peräst
ni kõik om likõ.
roosiq aianukah
makassõ viil
ja niidõt moro
hõngas rõskust
pääle mitut päivä sato.